



ՄԻՋԱՆԿՅԱԼ ԶԵԿՈՒՅՑ N 2

10-24 մայիս

ԵԱԴ «Արդար քվե» դիտորդական առաքելության երկրորդ միջանկյալ զեկույց

հիմնված երկարաժամկետ դիտորդների հաղորդումների և հրապարակային տվյալների վրա, որոնք արձանագրված են հետևյալ էլկայքերում

արդարքվե.հայ
youthvote.live
fyca.net

1. Պաշտոնական դիրքի, վարչական ու պետական ռեսուրսի չարաշահում

Իրավական համատեքստ. Հանրային պաշտոնյաներին և ծառայողներին արգելվում է իրենց պաշտոնական դիրքն օգտագործել կուսակցական շահերի համար («Հանրային ծառայության մասին» օրենք, վարքագծի կանոնագիրք): Պետական ռեսուրսները (աշխատաժամանակ, տարածք, տեխնիկա, անձնակազմ) չեն կարող օգտագործվել քաղաքական ուժի օգտին: Միջազգային չափանիշները պահանջում են վարչական ռեսուրսների չեզոք և ոչ խտրական օգտագործում ամբողջ ընտրական գործընթացում:

Դրսևորումներ.

- ՀՀ վարչապետ Նիկոլ Փաշինյանը մայիսի 16-ին ֆեյսբուքյան էջում առաջարկել է վարորդական իրավունքից զրկված անձանց իրավունքը որոշակի պայմաններով մեկ տարի անց առանց քննության վերականգնել, այնուհետև նույն օրը հարցում է դրել առցանց քվեարկության՝ պարտավորվելով իրականացնել հանրային աջակցության դեպքում: Առաջարկը ներկայացվել է որպես գործող վարչապետի նախաձեռնություն, այլ ոչ թե կուսակցական թեկնածուի խոստում, ինչը խախտում է վարչական ռեսուրսի չեզոքության սկզբունքը:

- Սպիտակի համայնքապետի տեղակալ Արտակ Մաթոսյանը աշխատանքային ժամին ներկա է գտնվել իշխող ուժի քարոզարշավին և լրագրողի հարցին ի պատասխան հայտարարել է՝ «Աշխատանքի եմ, բա Հանրապետության վարչապետն է եկել»՝ փաստացի արդարացնելով պաշտոնական ժամանակի օգտագործումը կուսակցական նպատակներով:
- Վերին Արտաշատում համայնքային մշակույթի կենտրոնի (ՀՈԱԿ) տնօրենի ժամանակավոր պաշտոնակատար Նինել Գաբրիելյանը և պարուսույց Տիրուհի Սողոմոնյանը կազմակերպել և մասնակցել են «Քաղաքացիական պայմանագիր» կուսակցության քարոզչական միջոցառմանը՝ ի պաշտոնե հանդես գալով և օգտագործելով համայնքային ռեսուրսներ:
- Ստեփանավանում, քաղաքապետի հրահանգով մանկապարտեզների, հիվանդանոցի, դպրոցների աշխատակիցները մասնակցել են ՔՊ հավաքին:
- Ստեփանավանում, ՔՊ կուսակցության հանրահավաքին վարչական ռեսուրս է ներգրավվել, մասնավորապես, համայնքապետարանի կոմունալ բաժնի աշխատակիցները տեղում մասնակցել են քարոզչական նյութերի տեղադրման և ապամոնտաժման աշխատանքներին:

2. Պարտադրանք, ճնշում, ահաբեկում, աշխատանքից ազատում

Իրավական համատեքստ. Քրեական օրենսգիրքի հոդված 236 (հավաքին մասնակցելուն հարկադրել), հոդված 203 (խտրականություն): Արգելվում է աշխատողներին սպառնալ աշխատանքից ազատելով կամ այլ բացասական հետևանքներով նրանց քաղաքական ընտրության վրա ազդելու նպատակով:

Դրսևորումներ.

- Ապարան համայնքում մայիսի 13-ին իշխող կուսակցության քարոզարշավի ժամանակ դպրոցների տնօրենները և ուսուցիչները աշխատանքային ժամերին կազմակերպված մասնակցել են միջոցառմանը, իսկ աշակերտներին հրահանգվել է դուրս բերել դասապրոցեսից՝ վարչապետին դիմավորելու համար: Երեխաներին տրվել են պարտադրողական բնույթի ցուցումներ նույնիսկ արտաքին տեսքի (հյուսեր, հագուստի գույն) վերաբերյալ:
- Վերին Արտաշատի միջնակարգ դպրոցում դասապրոցեսը նախատեսվածից շուտ է ավարտվել, որպեսզի աշակերտները մասնակցեն վարչապետի հետ հանդիպմանը: Միջոցառմանը ներկա են գտնվել նաև դպրոցի ուսուցիչներն ու տնօրեն Շուշանիկ Հախնազարյանը:
- ՔՊ քարոզիչների՝ դռնեղուտ քարոզի ժամանակ անչափահաս՝ 16-ամյա մի տղա, բակի զրուցարանում նստած, իր անհամաձայնությունն է բարձրաձայն հայտնել ՔՊ-ի լոգունգները բացականչողների ուղղությամբ: Նրան են մոտեցել թաղապետարանի առևտրի բաժնի աշխատակիցները՝ հասուն տղամարդիկ,

հորդորել են, որ «խելոք սթրվի տեղը», ապա խոստացել են, որ հետո գալու են նրա ետևից:

- Տավուշի մարզպետ Հայկ Ղալումյանը 2023թ. հոկտեմբերի 19-ին Արթուր Մելիքյանին նշանակել է Այգեձորի միջնակարգ դպրոցի վարչատնտեսական մասի համակարգող, նրա հետ կնքելով աշխատանքային պայմանագիր՝ 5 տարի ժամկետով, սակայն ազատել է պաշտոնից ընդդիմադիրների հավաքին մասնակցելու համար:

3. Ատելության խոսք, նվաստացում, քաղաքական անհանդուրժողականություն

Իրավական համատեքստ. Ատելության խոսքն արգելվում է Ընտրական օրենսգրքով (քարոզչության ժամանակ) և Քրեական օրենսգրքով (զանգվածներին ատելություն հրահրելը): Հանրային պաշտոնյաների վարքագծի կանոնագիրքը պահանջում է զսպվածություն և հարգալիք վերաբերմունք:

Դրսևորումներ.

- Նախընտրական քարոզարշավի ընթացքում արձանագրվել է անհարգալից խոսույթի, անձնական վիրավորանքների, սպառնալիքների և անպարկեշտ բռնապաշարի կիրառման զգալի աճ, ինչը նպաստում է հասարակական լարվածության մեծացմանը:
- Արթուր Օսիպյանի և Նիկոլ Փաշինյանի միջև տեղի ունեցած բանավեճի ընթացքում կողմերը փոխադարձաբար կիրառել են կոշտ, սուր, որոշ դեպքերում՝ անպատշաճ արտահայտություններ: Հատկապես մտահոգիչ են վարչապետի կողմից Արցախից բռնի տեղահանված անձանց ուղղված արտահայտությունները, որոնք սրում են հանրային տրամադրությունները:
- Կոռուպցիայի կանխարգելման հանձնաժողովը (ԿԿՀ) մայիսի 14-ին հայտարարությամբ անդրադարձել է նախընտրական շրջանում պաշտոնատար անձանց արտահայտման ազատության սահմաններին՝ ընդգծելով բարեկիրթ, հարգալիք վարքագծի և զսպվածության կարևորությունը:
- ՔՊ կուսակցության առաջնորդը սպառնում է Բարգավաճ Հայաստանի կուսակցության առաջնորդին վարչական ռեսուրսի օգտագործումը օտարելիս սեփականության իրավունքով պատկանող գույքը, ինչպես նաև պարապուրդի կոչ է անում գործարանի աշխատակիցներին:
- ՔՊ կուսակցության նախընտրական ցուցակի 1-ին համար Ն. Փաշինյանը քարոզարշավի ժամանակ վիրավորելով տարբեր քաղաքական թիմերի ներկայացուցիչների՝ Սամվել Կարապետյանի մասին արտահայտվել է հետևյալ կերպ. «Պետության համը կոկորդիդ ա մնալու, խոխոալու ես»:

4. Անչափահասների և երեխաների ներգրավում քարոզչությանը

Իրավական համատեքստ. ՄԱԿ-ի Երեխայի իրավունքների կոնվենցիա, ՄԱԿ-ի Երեխայի իրավունքների կոմիտեի ուղեցույցներ -- երեխաները չպետք է մանիպուլացվեն քաղաքական նպատակներով, չեն կարող ենթարկվել ռիսկերի (հրմշտոց, բռնություն, ոչ պատշաճ լեզու): «Հանրակրթության մասին» ՀՀ օրենքն արգելում է ուսումնական հաստատություններում քաղաքական գործունեություն կամ քարոզչություն:

Դրսևորումներ.

- Ապարան համայնքում մայիսի 13-ին դպրոցականներին դասերի ժամանակ դուրս են բերել դասապրոցեսից՝ վարչապետին դիմավորելու և քարոզչական միջոցառմանը մասնակցելու նպատակով: Երեխաներին բաժանվել են դրոշներ, տրվել են հրահանգներ արտաքին տեսքի վերաբերյալ: Ծաղկաշեն գյուղի դպրոցի աշակերտներին բաժանվել են «Քաղաքացիական պայմանագիր» կուսակցության խորհրդանիշներով շապիկներ:
- Վերին Արտաշատում մշակույթի տան սաները (երեխաներ) ներգրավվել են քաղաքական քարոզչական միջոցառմանը, իսկ դպրոցի աշակերտների համար դասապրոցեսը վաղաժամկետ ավարտվել է՝ հանդիպմանը մասնակցելու համար:

5. Ընտրական հանձնաժողովների գործունեության թերություններ

Իրավական համատեքստ. Հանձնաժողովները պետք է աշխատեն թափանցիկ, անկողմնակալ, ապահովեն հավասար մուտք և մատչելիություն:

Դրսևորումներ.

- ԿՀՀ կայքում մայիսի 14-ի դրությամբ ընտրություններին մասնակցող 19 քաղաքական ուժերից միայն 8-ն են հրապարակել իրենց նախընտրական ծրագրերը: Թեև օրենքով պարտադիր չէ, ծրագրերի հրապարակումը ժողովրդավարական ընտրությունների հիմնարար տարր է, որը թույլ է տալիս ընտրողին գիտակցված որոշում կայացնել:
- 11 քաղաքական ուժ դեռևս չի ներկայացրել իր ծրագիրը:

6. Կուսակցությունների ֆինանսավորման թափանցիկության լուրջ խնդիրներ

Իրավական համատեքստ. Ընտրական օրենսգրքի 26-րդ հոդվածի 10-րդ մասի համաձայն՝ ընտրություններին մասնակցող ուժերի բանկային հաշիվների մնացորդների, մուտքերի և ելքերի վերաբերյալ տվյալները բանկերը երեք աշխատանքային օրը մեկ պետք է ներկայացնեն ԿԿՀ-ին, որը պարտավոր է ամփոփել և հրապարակել դրանք:

Դրսևորումներ.

- Ըստ ԿԸՀ ժամանակացույցի ֆինանսական հաշվետվողականության գործընթացը պետք է մեկնարկեր մայիսի 7-ից: Սակայն մայիսի 14-ի դրությամբ ԿԿՀ կայքում որևէ ամփոփ տեղեկանք առկա չէ: Տվյալների ժամանակին հրապարակման բացակայությունը խոչընդոտում է ընտրողների և քաղաքացիական հասարակության գիտակցված դիրքորոշում ձևավորելու հնարավորությունը:

7. Քարոզչական նյութերի ապօրինի տեղադրում

Իրավական համատեքստ. Ընտրական օրենսգրքը հստակ սահմանում է, որ հանրության համար տեսանելի քարոզչական պաստառ, քարոզչական տպագիր և այլ նյութեր կարող են տեղադրվել միայն համայնքի ղեկավարի կողմից հատուկ այդ վահանակների վրա, ընտրական շտաբների վրա:

Բազմաբնակարան կամ ստորաբաժանված շենքերի վրա քարոզչական պաստառ, քարոզչական տպագիր և այլ նյութեր կարող են տեղադրվել միայն արտաքին պատերին տեղադրված վճարովի գովազդային վահանակների վրա: Նախընտրական քարոզչություն իրականացնելու իրավունք ունեցող ֆիզիկական անձինք առանց սահմանափակման կարող են կրել քարոզչական նյութեր, տեղադրել դրանք իրենց պատկանող կամ իրենց տիրապետման ներքո գտնվող շենքերի, շինությունների վրա կամ դրանց ներսում:

Դրսևորումներ.

Թիվ 14 ընտրատարածքային հանձնաժողովի գործունեության հասցեից մոտ 100 մետր հեռավորությամբ՝ Էջմիածնի Մաշտոցի փողոցի բազմաբնակարան շենքի վրա փակցվել է Քաղաքացիական պայմանագիր կուսակցության քարոզչական պաստառը:

Ակնհայտ է, որ տեղադրված պաստառը չափերով մեծ է և դուրս է եկել անձին պատկանող կամ նրա կողմից օգտագործվող տարածքից:

8. Ընտրական գործընթացին միջամտություն ուսումնական հաստատություններում

Իրավական համատեքստ. «Հանրակրթության մասին» ՀՀ օրենքն արգելում է ուսումնական հաստատություններում քաղաքական գործունեությունը: Ընտրական օրենսգիրքն արգելում է նախընտրական քարոզչությունը ուսումնական հաստատությունների աշխատողներին ի պաշտոնե հանդես գալիս:

Դրսևորումներ.

- Ապարան համայնքում մայիսի 13-ին մի շարք դպրոցների տնօրեններ, ուսուցիչներ և աշակերտներ կազմակերպված մասնակցել են իշխող կուսակցության քարոզարշավին՝ դասապրոցեսը խաթարելով: Դպրոցի ղեկավարները հեռախոսագրույցներում խիստ տոնով հրահանգավորել են ապահովել երեխաների պարտադիր մասնակցությունը:
- Վերին Արտաշատի միջնակարգ դպրոցում դասապրոցեսը նախատեսվածից շուտ է ավարտվել, որպեսզի աշակերտները մասնակցեն վարչապետի հետ հանդիպմանը:

9. Լրատվամիջոցների ու սոցիալական ցանցերի կողմնակալ օգտագործում

Իրավական համատեքստ. Լրագրողի մասնագիտական գործունեությանը խոչընդոտելը քրեական հանցագործություն է (Քրեական օրենսգիրք, հոդված 237):

Դրսևորումներ.

- Մայիսի 13-ին Սպիտակում «Ազատություն» ռադիոկայանի լրագրողը փորձել է պարզաբանում ստանալ համայնքապետի տեղակալ Արտակ Մաթոսյանից առ այն, թե ինչու է վերջինս աշխատանքային ժամին ներկա իշխող ուժի քարոզարշավին: Ի պատասխան՝ համայնքապետի տեղակալը հարվածել է տեսախցիկին և հայտարարել, որ աշխատանքի է, քանի որ վարչապետն է եկել:

10. Ընտրական օրենսդրության այլ խախտումներ և բացեր

Դրսևորումներ.

- **Վարչական իրավախախտման քրեականացում (Ա. Հովհաննիսյանի գործ).** Քաղաքացի Արմեն Հովհաննիսյանը ձերբակալվել էր նախընտրական քարոզչական պաստառ պոկելու համար, և նրա նկատմամբ նախաձեռնվել էր քրեական վարույթ (Քրեական օրենսգրքի 211-րդ հոդվածով), չնայած որ նույն արարքը Վարչական իրավախախտումների օրենսգրքի 40.11-րդ հոդվածով նախատեսում է միայն տուգանք: Ձերբակալվածի կարգավիճակում գտնվող անձը ոստիկանների ուղեկցությամբ տեղափոխվել է Հոգեկան առողջության պահպանման ազգային կենտրոն, որտեղ մեկ օր անց ինքնասպան է եղել: Արդար Քվե դիտորդական առաքելությունը գործողությունը համարում է ոչ իրավաչափ, անհամաչափ և վարչական ռեսուրսի քաղաքականացված կիրառման դրսևորում:
- **Արթուր Օսիպյանի քրեական հետապնդում:** Վերջինիս նկատմամբ հարուցված քրեական գործը (հոդվածներ 330, 297, 211)՝ Նիկոլ Փաշինյանի հետ բանավեճի արդյունքում արված արտահայտությունների համար, առաքելությունը գնահատում է որպես առերևույթ չհիմնավորված և անօրինական: Արտահայտությունները, թեև կոշտ, գտնվել են քաղաքական քննադատության շրջանակում և չեն կարող ողջամտորեն որակվել որպես խուլիգանություն, քարոզչությանը խոչընդոտում կամ բռնության կոչ:
- **Խաղաղ հավաքի ազատության խոչընդոտում.** Մայիսի 20-ին Հանրապետության հրապարակում «Բոլորին դեմ եմ» կուսակցության ակցիայի ժամանակ ոստիկանությունը նախ առաջարկել է տեղափոխել վայրը, ապա առգրավել է ակցիայի համար նախատեսված գոլային դարպասը: Ակցիան կրել է խաղաղ բնույթ, չի խոչընդոտել կառավարության շենքի մուտքն ու ելքը, և քանի որ մասնակիցների թիվը 100-ից պակաս էր, «Հավաքների ազատության մասին» օրենքի համաձայն իրազեկում չի պահանջվում: Ոստիկանության գործողությունները գնահատվում են ոչ օրինական և անհամաչափ:

Ընտրախախտումների մասին հաղորդումներ ԵԱԴ դիտորդներից բացի կարող են ներկայացնել նաև մեր քաղաքացիները՝ այցելելով [արդարքվե.հայ](http://youthvote.live) կամ youthvote.live էլկայքեր:

ՇՆՈՐՀԱԿԱԼՈՒԹՅՈՒՆ